

**Inissianik attartorneq pillugu Inatsisartut peqqussutaata  
allanngortinneqarneranik Inatsisartut peqqussutissaattut siunnersuut  
pillugu**

**Inatsisartut Attaveqaqatigiinnermut Ineqarnermullu Ataatsimiititaliaata**

**ISUMALIUTISSIISUTAA**

**siunnersuutip aappassaaneerneqarnerani saqqummiunneqartoq**

**Inatsisartut Attaveqaqatigiinnermut Ineqarnermullu Ataatsimiititaliaat  
suliarinninnermini ukuningga inuttaqarpoq:**

Inatsisartunut ilaasortaq Agathe Fontain, Inuit Ataqaqatigiit, siulittaasup tullia  
Inatsisartunut ilaasortaq Ellen Christoffersen, Godmand Rasmussenimut  
sinniisussaq, Atassut, siulittaasoq  
Inatsisartunut ilaasortaq Isak Davidsen, Tommy Marumut sinniisussaq, Siumut  
Inatsisartunut ilaasortaq Jens Lars Fleischer, Agnethe Davidsenimut sinniisussaq,  
Siumut  
Inatsisartunut ilaasortaq Lene Knüppel, Palle Christiansenimut sinniisussaq,  
Demokraatit

Inatsisartut Attaveqaqatigiinnermut Ineqarnermullu Ataatsimiititaliaata  
peqqussummut siunnersuutip nassuiaatitai ilanngullugit tusarniaanermullu akissutit  
siullermeernerata kingorna misissorneqarsimapput.

**Isumasioqatigiilluni ataatsimiinneq**

Ataatsimiititaliami siunnersuutip suliarinerani Ineqarnermut, Attaveqarnermut  
Aatsitassanullu Naalakkersuisunut ilaasortaq isumasioqatigiilluni  
ataatsimeeqatigineqarpoq. Ataatsimiititaliap apeqqutai Naalakkersuisullu akissutai  
isumaliutissiisummut ilanngunneqarput.

**Siunnersuutip imarisai**

Inatsisartut peqqussutaanni atuuttumi siunnersuutit teknikkikkut ersarissaatinik  
aralinnik aammalu atortunut allannguutininik ataasiakkaanik imaqarput. Inatsisinut

tungavissamut allannguutininut siunertami pingaarneq tassaavoq attartortut piginnittunngorsinnaanerat taamatullu atorfirminnut atatillugu inissiatik nalinginnaasumik inissiaq attartortutut pingilersinnaalerlugu. Taassuma saniatigut inissiat attartortakkat ajornannginnerusumik piginneqatigiilluni inissiannngortissinnaaneri siunertaapput, kiisalu Namminersornerullutik Oqartussani kommuninilu inissiat attartortakkat aningaasanik akileqquneqartarnissannut tungaviussaaq, ininut akiliutit najugarisap avatangiisiisa nalinginnaasumillu eqqarissaarnissap pitsanngorsarnissaannut atatillugu peqqussummi allannguutini siunnersuutigineqarput.

### **Ataatsimiititaliap peqqussummut siunnersuummut isumaliutai aalajangersagaalu immikkut ittut**

Inatsisartuni siunnersuutip siullermeerneqarnerani Siumumiit Atassummiillu ilalertinneqarpoq, Inuit Ataqatigiinniillu ataasiakkaanik nangaassutigineqarluni. Demokratit inatsisartut peqqussutaani allannguuteqartoqarnissaa kissaatigaat. Inatsisartunili najoqqutassat naleqqussarnissaat pisariaqartinneqartoq paasinartinneqarput Naalakkersuisullu siunnersuummi anguniakkat tunuliaqutaasut saqqummiunneqarnerani siunertarivaat.

Siunnersuummi nr. 4 tungavigalugu attartortoq suliffimminut atatillugu najugalik inissiaq attartortakkatut attartulersinnaagaa ataatsimiititaliap pissusissamisoortutut isigaa. Taamatut taanna annertunerusumik suliffissaqarniarnikkut nuttarnersinnaavoq, taamaalilluni suliffimmut aalajangersimasumut pituttorsimajunnaassagami. Nalinginnaasumik inissianik utaqqisut allattorsimaffianni allatsissinnaatitaaffimmut piumasaqaatit atorunnaarsinneqassasut ataatsimiititaliaq Naalakkersuisutulli isumaqarpoq. Tamatumunnga ullumikkut aalajangersakkat atuuttut malillugit inuttaasut atorfirminnut atatillugu inigisatik nalinginnaasumik attartorsinnaalernissaannut ajoqutaasutut tungavigineqarsimagamik.

§ 1, nr. 4 pillugu annertuumik inissianik isumaginninnermi utoqqalinersiutilinnut ajornartorsiutaakkajuttarpoq, imatut taakku utoqqalinersiuteqarnermut ikaarsaarnermi inissiaqarnikkut qulakkeerneqarsinnaasartut ataatsimiititaliap paasivaa. Naalakkersuisut peqqussummi § 32, imm. 8-mi aalajangersakkami tassani attartortitsisoq attartortumit tapiissummik piumasaqarsinnaalluni piginnaatitaassasoq Namminersornerullutik Oqartussat kommunillu ilaqutariinnut arlalinnut illutaanni attartortup aningaasartuutaat najugaqarfinni pitsanngorsarnissaasa matussuserneqarnissaannut imaluunniit inissiami aningaasaleeqqinnermut atugassatut ilaatinneqassasut ataatsimiititaliap kissaatigigaa. Aalajangersakkani § 32, imm. 7 taperitinneqarpoq maannakkut peqqussummi atuuttumi, imatut allassimasumi (oqaatsit issuakkat aallartipput:) "*Attartortitsisup Namminersornerullutik Oqartussat kommunillu ilaqutariinnut arlalinnut illuutaanni attartortut akiliisissinnaavai, najugaqatigiiffimmi aserortersarnermik pinaveersaartitsinnermut atatillugu aningaasartuutininut naleqquttunut matussutissanik.*" (oqaatsit issuakkat naapput.) Aalajangersagaq nutaaq taanna imm. 8-mi innuttaasunut siammasinnerusumik sunniuteqarpassippoq. Inatsisartut oqaaseqaatini ilaatigut oqaatigaat (oqaatsit issuakkat aallartipput:) "*Taakku saniatigut akiliutit aamma attartortitsisup*

*inissiaataanni aningaasaleeqqinnernut atorneqarsinnaapput, assersuutigalugu igaffinnut nutaanut, perusuersartarfinni uffarfinnilu pisattanut imaluunniit illup qaliaannik aneerasartarfiinillu iluarsaassinermut. Akiliutissaq akilersinneqartoq attartortitsisup inissiaataannut tamanut ataatsimut atugassatut akilersinneqartassaaq, tassani aningaasanik agguaassisarnissaq pisariaqartitsinerup naliliiffigineqarnera naapertorlugu pisassammat. Taamaattumik assersuutigalugu Sisimiuni imaluunniit nunaqarfiit ilaanni akiliutigitinneqartut Nuummi inissianut atorneqarsinnaapput aammalu paarlattuanik pisoqarsinnaalluni." (oqaatsit issuakkat naapput.)*

Aammattaaq Naalakkersuisut oqaaseqaatini oqaatigaat (oqaatsit issuakkat aallartipput) "*Akiliutissap annertussusissaa ukiumoortumik Inatsisartut aningaasanut inatsisaanni oqaasertaliinikkut aalajangerneqartassaaq*" (oqaatsit issuakkat naapput). Aningaasanut inatsimmi tapiissutit aalajangernerat ilanngussinikkut tapiissutip annertussusaa naleqqussarlugu allanngorarsinnaatilerpaa. Ilanngussap aamma Inatsisartut Aningaasaqarnermut Ataatsimiititaliaa tapiissutini allannguutaasinnaasunut naliliisinnaanngortippaa.

#### **§ 1, nr. 14-imi maalaarsinnaanermut allannguut.**

Ineqarnermut maalaaruteqartarfimmi immikkut ittumi piginnaanngorsaannermi ineriartortitsinermilu maalaaruteqarsinnaanissap ajornannginnerusumik pisinnaalerniassammat allannguutissamut siunnersuutip atuutilersinneqarnissaa qulakkeerneqassaaq, ataatsimiititaliaq paasinnippoq. Immikkoortortap taassuma Namminersornerullutik Oqartussaniit kommuniniillu avataaniit aqutsisuutinneqartup suliasassavai. A/S Inissiaatileqatigiiffik INI imaluunniit Iserit A/S assersuutigalugu avataaniit aqutsisuusinnaapput. Aalajangersakkap Namminersornerullutik Oqartussat pisortani oqartussat qaffasinnerinnaat aalajangigassaattut inissisimanera killilerpaa. Attaveqatigiinnermut Ineqarnermullu Ataatsimiititaliap innuttaasut inatsisitigut inissisimanerat maalaarutinut sulianut tunngatillugu tunngaviliisutut allannguinuq allannguisutut isiginngilaat. Aningaasaqarnikkut aqutsinikkulluunniit naliliinermi pisortani oqartussat qaffasinnerinnaat aalajangiisarnerat imminnut atanngitsumik ataavartinnissaat annertuumik iluaqutaassapput, innuttaasut maalaarnerminnut atatillugu isummerfigissagaat ataatsimiititaliap paasivaa.

#### **Nammaqatigiilluni akiliisarnissamut nalinginnaasumik eqqarsaatit (uunga immikkoortortamut ataatsimiititaliaq qanoq isumaqarpa?)**

Najugaqarfimmi pitsanngorsaannermi inissiaqarfinnilu atoruminarsaasinnaanermut atatillugu nammaqatigiilluni akiliisarnissamut ajunngequtaasinnaasut ajoqutaasinnaasullu Attaveqatigiinnermut Ineqarnermullu Ataatsimiititaliap eqqarsaatigisimavaat. Aallaqqaatit oqaatigineqarsinnaavoq, aqutsinikkut aaqqiinerit Inatsisartunit siunnersuutigineqartutut ingerlatseriaatsini ajunngequtit aqukkuminarmata. Ataatsimullu isigalugu attartortunut tamanut najugaqarfimmi pitsanngorsaannermi inissiaqarfinnilu atoruminarsaasinnaanermut atatillugu nammaqatigiilluni akiliisarnissaq nammaqatigiinnermi nalimmassaassaaq.

Nammaqatigiilluni akiliisarnissamut attartortutut init najugarinngisat nungullarnikut nutarterneqarnissaannut akiliummi aningaasaliinermut akileeqaataasinnaaneq soorunalimi ajoqutaasinnaavoq. Nammaqatigiilluni akiliisarnissamut ilutsip naalackersuinikkut anguniakkani agguaqatigiinnermi isiginninnermik aamma imaqarpoq. Namminersornerullutik Oqartussat kommunillu ilaqutariinnut arlalinnut illuutaasa qanoq issusiat nutarternissamullu pisariaqartitaat assigiinneqaaat. Inissiani immikkoortortani ataasiakkaani namminneq aningaasaatinik akiliisassagaanni, nutarterinernut pisarialinnut piumasaqaatigineqartunullu inissianut akiliummut annertuumik assigiinngisitsisinnaavoq, apeqqutaalluni sumi attartortuunerluni. Innuttaasut piviusumik attartugassanut assigiinngitsunut toqqaasinnaanginnerat maluginiaqquneqarpoq. Namminersornerullutik Oqartussat atorfilinnut inissiaataanni innuttaasunullu isumaginnernermut atatillugu inissianut tunineqartartunut assersuutigalugu aamma atuuppoq.

Nunatsinni inissiat amerlanersaat nungullarnikuupput. Ukiut ingerlanerini sila atuinerullu inissiat nungullarnerannut ataavartumik aserfallatsaaliinerit malinnaasimangillat. Inissianut akigititat ukiut ingerlanerini ilimagisamik aningaasatigut pisariaqartitat pisortatigut inissiaateqarnermi piumasaqaatitut ataavartumik aserfallatsaaliinermi nutarterinermilu aningaasatigut iluanaarutit tamakkiisumik malinnaasimangillat. Ulloq manna tikillugu inissianut attartortut, attartornermut nutarterinermullu kinguaattoornernut atatillugu aningaasartuutit piviusoq malillugu assigiinngimmata akiliutitik iluanaarutigisinnaasimavaat. Attartortunit nutarterinissamut pisariaqartitat aningaasaliiffigineqarnianngippata, inissiaqarnerit nungullarteqqinneqaannassapput imaluunniit akileraartarnikkut qaffaanikkut akilerneqartariaqassapput. Aningaasat landskarsimiittut Inatsisartunit sanaartornissanut pilersaarutinut aalajangersimasunut tassa atuarfinnut, utoqqaat illuinut, erngup nukinganut nukissiorfinnullu pituttorsimasuummata ataatsimiititaliap Naalackersuisut sanaartornissaq siunnersuutigineqartoq pissusissamisoorsooraat. Taamaattumik inissiat pisortanit pigineqartut aseroriartoqqinnissaat kissaatiginartinneqanngilaq. Aamma akileraartarnikkut qaffaanikkut aningaasaliinissaq aallaavissatut naleqqutinngilaq nunatta ajunngitsumik aningaasatigut ineriartorerata ataavartinneqarnissaata tunngavia eqqarsaatigalugu. Taamaattumik innuttaasunik inissiaqarnermut agguassinermilu tunngasuni assigiitsitsineq naalackersuinikkut anguniakkani inissisimanermi nammaqatigiilluni akiliisarnissamut periuseq malillugu pitsaanerpaamik qulakkeerneqassasoq ataatsimiititaliap isigaa.

Atuuttussanngortitsinermut atatillugu sapinngisat tamaat ersarissaasoqarnissaa Naalackersuisut tassunga attuumassutilimmik aningaasaliissutit aningaasaqarnermi inatsimmi angissusilerneqarnerisa qulakkeerumaaraa naggataarutaasumik Ataatsimiititaliamit maluginiarneqarpoq.

**Ataatsimiititaliap inassuteqaatai**

**Ataatsimiititaliap isumaqatigiittoq siunnersuut ilusimisut iluseqartoq akuersissutigineqassasoq innersuussutigaat.**

Inatsisartut peqqussutaannut allannguutissatut siunnersuut inatsisartut  
peqqussutaanni inissianik attartorneq pillugu siunnersuutip  
aappassaaneerneqarnissaata ingerlateqqinnissaanut Inatsisartut  
Attaveqaqatigiinnermut Ineqarnermullu Ataatsimiititaliaat taamatut oqaaseqarpoq.

Agathe Fontain  
Siulittaasuugallartoq

Jens Lars Fleischer

Ellen Christoffersen

Lene Knuppel

Isak Davidsen

---

[Ilanngussaq 1](#) (pdf-format)

[Ilanngussaq 2](#) (pdf-format)